

**■ COLUMNA**

# Lavur cumina per tuts

DA BERNARD CATHOMAS

**D**uai il servetsch militar restar obligatoric u daventar facultativ? Sco ils blers da mia generaziun hai jau fatg quasi in onn militar, senza avair in grad spezial. Fissi da mes temp stà facultativ, avessan jau e blers auters probabel strusch fatg quai.

**T**uttina vegnan blers a conceder oz ch'il servetsch ha purtà dapli che quai ch'ins carteva. Jau enconusch anc oz blers camarats da lezs onns, hai emprendì d'enconuscher regions e lur populaziun che jau n'enconuschesch betg uschia senza il militar. Ed jau sun daventà cunscient ch'in servetsch per la cuminanza è in'obligaziun da mintgin.

**S**ch'i daventa facultativ, Stgi fa alura anc servetsch? Mo in pèr idealists? Mo ils Svizzers da professiun? Mo quels che na san far nagut auter? Mo ils fanatichers militars? Il facultativ sustegna la cumadavladad da mintgin e dat signals cuntraproductivs. Declarar il servetsch militar facultativ ma para problematic.

**P**roblematic èsi dentant er da pretendere oz in servetsch militar obligatoric. Sche tuts faschessan re-



crut avess la Svizra memia bler schuldada per l'armada reducida, decidida ils davos onns. Per quel motiv han ils responsabels militars apparentamain pauc encunter che blers sa fan libers da l'obligatori, savens cun verclas marschas. Sin internet sa mintgin leger tge far co per mitschar dal militar. Il dumber da quels che sa stgisan è considerabel. In obligatori che mintgin sa guntgir daventa ina farsa.

**P**er mai èsi inquietant ch'ils iniziants per in servetsch militar facultativ s'engaschan per in'idea liberala senza dimensiun sociala. Quai che faschess oz da basegn e senn fiss plitost in servetsch general (betg mo militar!) obligatori che pretendess da mintgin e da mintgina – en ina moda u l'autra – in engaschament per la cuminanza. En ina

cuminanza sco quella svizra stuess mintgin esser obligà da far durant in tschert temp lavur cumina.

**Q**uai pudess esser servetsch militar u servetschs civils da tuttas sorts: organisar e realisar occurrenzas publicas (nuva ch'ils voluntaris mancan), agid en cas da catastrofes, lavur da giuventetgna, engaschis socials, manar gruppas da sport, far trutgs, tgirar gauds e biotops, s'engaschar per projects culturals, lavur politica... E sa chape-scha avair ed educar uffants, sa gidar cun famiglias en travaglias... La glista per talas lavurs vegniss lunga. Uschia fiss er la discussiun giu da maisa, schebain las dunnas ston far servetsch militar. I dat blers auters servetschs almain uschè impurtants per l'entira societad.

**L**a decisiun che nus lavain da prender proximamain a l'urna na schlia nagins problems. Tant il servetsch militar obligatori sco quel facultativ èn ideas depassadas. Forsa che la votaziun gida dentant a chapir ch'i sto dar insacura – sco er Avenir Suisse propona – in obligatori per servetschs a favur da la societad che surpessan il sector militar. Quai fiss ina decisiun per ina Svizra giusta, solidarica e moderna.